

Ra vita r'è bela

Co r'Ape, ma co ra testa. Un projeto par i soen, fato aduna con lore, par insegnà el valor de ra vita. Parcè che se pó fei ce che se vó, ma ignante bešen ese vive



Inze piazza, co r'Ape, coscita bule, a ra mostrà a i amighe.

- Tiò, varda mo ce 'na bela, chera Ape!

- Ai, ma ra toa r'è pi bela.

S'i sentia, a ciacolà, domegna dapò disnà, par piazza, dute chi tosatiei che i à vorù ese a el prin "Ape Rad-1", fato in Anpezo, co 'l Comun che à dià 'na man a chi de 'l Spazio Giovani. Da bonora i s'è ciatà, so da 'l tennis Apollonio, in Revis, e dapò i à podù pasà par piazza, ruà fin sote el cianpanin, daante a 'l padeon de ra musica, par bete fora ra so Ape, in mostron. I no n'ea de tante, 'na došena suposò, ma 'l é stà bel isteso. Se podarà fei depì, e meo, ra ota che vien. Su 'l palco, a zerne fora r'Ape pi bela, 'l ea 'na juria, col capocomun e alcuante de outre. Intrà de lore, 'l é stà fato un bon azeto a un foresto, che 'l à gnon Alessio Tavecchio, un soen che el vive scentà su 'na carozeta, dapò che el s'è scaazà el firo de ra schena, a tomà co ra moto, par strada, de 'l 1994. Da inalorà, par el 'l é scomenzà 'na vita noa: 'l é sù inaante a fei sport, cemodo che el fajea ignante, e depì ancora, 'l é ruà a ra Paralinpiades de Atlanta 1996, a nodà, e dà alcuante ane el s'ira par r'Italia, aduna co 'l

Automobil club talian, par parlà a ra šente, pi che see a i soen, par insegnà ce che 'l é da fei, canche se oga 'na moto, o 'na machina, ma pi che see ce che no n'è da fei.

Alessio Tavecchio el s'è fermà in Anpezo par tre dis e 'l à ciatà un grun de šente. Ignante 'l à parlà a i studentes de ra scora mešana;

dapò el s'è ciatà co i tošate de ra superiores; dinultima co i grei, co ra parsones de 'l paes, con dute chi che i à vorù s'ì a scotà chel che 'l aea da contà. E, dapò disnà de domegna, 'l ea inze piazza, a parlà a chiste tošate e chesta tošates che i ea ruade co ra so Ape. A dute lore 'l à dito de el valor pi gran che 'l é: ra vita. E, par ra vive polito, bešen ese sane, ra salute r'è el secondo valor. Duto el resto vien dapò: ra familia, i amighe, 'l amor, el sport, el šogo e duto chel che se pó se pensà. Par precurà ra vita e ra salute bešen i tende, canche se v'è par strada, che see su un automobile, da grei, su 'na moto, da soen, su ra bicicleteta, da pize. Pi che see da soen, 'l é bel s'ì de oga, de coren, fesc sentì polito, fesc deentà grei in prescia. Inveze 'l é senpre da se recordà ce che se 's é drio a fei, da se conosce, da pensà par nošoutre e par chi outre. E da s'ì nafré pi pian, parcè che a s'ì de oga 'l é pi fazile tomà, s'ì a petà, e canche se peta, se peta pi seco, se fesc un dan pi gran, se se spaca su.

Coscita chera tre šornades 's à soà, calchedun à de seguro inparà algo, che podarà i tornà bon, un doman.



Alessio Tavecchio 'l à tolesc par man un grun de soen, a i contà de ra so desgrazia e de cemodo che 'l é stà bon de s'ì inaante isteso. Parcè che chel che conta depì, par dute, 'l é ra vita.